

四庫全書

子部

欽定四庫全書

子部
冊府元龜卷五百五十四

詳校官中書臣朱文翰

侍讀臣孫球覆勘

總校官庶吉士臣何思鈞

校對官中書臣張九疇

謄錄監生臣姚元開

欽定四庫全書

冊府元龜卷五百五十四

宋王欽若等撰

國史部

總序

古之王者世有史官君舉必書書法不隱所以慎言行
示勸戒也自伏羲始造書契神農之世民風尚樸官設
未備黃軒之臣曰倉頡取象鳥跡以作文字記諸言行
竹冊而藏之史官之作蓋自此始

一云黃帝得圖書於
河洛史皇倉頡狀焉

又云沮誦倉頡為左右史

夏商皆有太史

古之太史雖以著述為宗而兼掌歷象夏太史終古

當桀之暴知其將亡乃執其圖法奔於商商太史高勢知紂之亂載其圖法奔於周

周監二代竝

建衆職春官宗伯之屬有太史掌建邦之六典下大夫

二人上士四人小史掌邦國之志中士八人下士十有

六人內史掌王之八柄之法以詔王治中大夫一人下

大夫二人上士四人中士八人下士十有六人外史掌

書外令四方之志及三皇五帝之書上士四人中士八

人下士十有六人皆有府史胥徒之屬

文武之時有史佚穆王有內史

作穆天子傳宣王有史籀幽王有太史伯陽一云老子為柱下史惠王有內史過襄王有內史叔興父 諸

侯亦各有國史

齊有南史子余史囂晉有太史屠黍見晉之亂亦以其圖法歸周又有太史趙

太史董狐史墨史蘇衛有史華龍滑魯有太史克左丘明楚有左史倚相及史老秦穆公十三年初有史以紀

事魯又有外史鄭有太史而無名者而晉大夫趙鞅亦有書過之臣乃陪臣之僭也戰國之世咸

有史官

秦趙會澠池各命侍史書事齊田文每對賓客令紀於屏風皆其事也

秦并天下

有太史令御史之名

太史令胡毋敬作博學章御史張蒼掌柱下方書之類是也

漢

武帝始置太史公位在丞相上

以司馬談為之天下文書先上太史副上丞相

談卒子遷嗣

宣帝改為太史令行太史公文書其修撰之職

以官領之太史之官唯知占候而已

又有禁中起居注注宮中起居之任

王莽改置柱下五史

秩如御史聽事侍旁記其言行此又起居之職也

漢氏中

興圖籍多在東觀故使名儒著作其中有其名而尚未

有官

明帝時班固傳毅為蘭臺令史與雒陽令陳宗等四人著作東觀皆他官兼著作之名終漢之世率

以他官修史

又有起居注

馬皇后撰禁中起居之類是

魏明帝太和詔

置著作郎一人佐郎一人竝隸中書省專掌國史亦有

他官兼領

衛覬以侍中充著作是也其後增佐郎為三人

中書著作郎專修國

史而起居注無聞焉吳蜀分據亦各有史職

蜀有王崇補東觀吳

有左國史薛瑩右國史華覈太史令丁孚韋曜等參撰國書 晉因魏制而中書著作

郎雖掌史注亦為兼官 著作郎俗謂之大著作荀勗以中書監孫盛以秘書監孫綽以

散騎常侍 並領著作 惠帝元康二年改中書著作為秘書著作專掌

史任隸秘書省 後雖別置署而所隸如故 佐郎八人 秘書監自 哀帝

興寧二年省四人孝武康寧元年復置八人 晉制佐著作郎始到必撰名臣

入僭偽諸國亦有史職 前趙劉聰存左國史撰其國君臣紀傳前涼張駿亦令史臣撰

國書於東苑後蜀西涼紀事委之門下南涼置國紀祭酒使撰錄時事自餘偽主多置著作官前趙和苞後燕

董統之類是也 宋因晉制改佐著作郎為著作佐郎掌國史兼

集起居注

宋室初建以未有名臣可作傳其制遂廢

齊太祖建元二年初置史官

歷梁陳國史起居之任多以他官兼領

齊以散騎常侍檀超驃騎記室

江淹掌史職侍中王思遠掌起居注梁周捨為尚書史部郎掌國史裴子野為著作郎仍兼掌國史及起居注

之名自齊梁至陳佐郎多為令僕子起家之選史職率以他官領之後魏置起居令史每

行幸宴會則在御左右記錄帝言及賓客訓答後又別

置修起居注二人以他官領之而隸於集書省北齊別

置起居省後周六官之建春官府置外史掌王言及作

動之事以為國誌即起居之職也又有著作上士二人

中士四人即佐郎之任皆掌綴國錄起居著作之任自

此分矣而著作不參史氏隋復置著作郎一人佐郎八

人隸秘書省掌國史集注起居煬帝置起居舍人二員

隸內史省

以古有內史外史今著作如外史遂置起居官以掌其內焉

唐高祖武德

初因舊制史官隸秘書省著作局置郎二人佐郎四人

太宗貞觀初省起居舍人改置起居郎二人隸門下省

省中每日伏退後帝與宰臣參議政事令起居郎一人執簡記錄

三年別置史館於禁

中專掌國史以他官兼領卑品有才亦以直館命宰臣

監修隸門下省著作局始罷領史職是年又於中書置祕

書內省以脩五代史高宗顯慶二年置起居舍人二員

隸中書省分掌左右龍朔二年改郎為左史舍人為右

史咸亨元年復舊武后天授二年又為左右史長壽二

年始修時政紀

自永徽以後左右史唯得對仗承旨仗下後謀議皆不聞是年宰相姚璿上言

以為帝王謨訓不可遂無紀述若不宣自宰相史官疎遠無得而書之遂請仗下後所言軍國政要宰相一人

撰錄為時政紀

神龍初復以左右史為起居郎舍人

每皇帝御殿對立於

殿下左郎右舍人有命臨陞聽退而書之以為起居注凡冊命啓奏封拜薨免悉載之以送史館

明皇

開元二十五年移史館於中書省北以其地切樞密記

事附近也憲宗元和四年令登朝官入館者竝為修撰

不過三員

官高者一人為判官

非登朝者竝為直館其宰相常以

一人監修國史亦有只監修國史

景龍中以侍中紀處訥中書令揚再思兵

部侍郎宋楚客中書侍郎蕭志忠竝修國史頓置四人代宗朝宰相元載憲宗朝宰相齊抗竝兼修國史

官受任於外亦或兼領史職就治所修撰及有許在家

修史者

開元八年以并州大都督府長史燕國公張說兼修國史齋史本就并州隨軍修撰其後詔說

致仕在家修史吳兢遷荊州司馬令就治所修唐書沈傳師湖南觀察使齋憲宗實錄就領修撰

五代

官局因循無改原夫史氏之職肇於上世所以記人君之言動載邦國之美惡著為典式垂之來裔申褒貶之微旨為懲勸之大法故其司筆削之任慎良直之選歷代審官莫斯為重今之所紀者凡推擇簡任之尤異討論撰述之始末家世職業之嗣掌揚榷讐對之裁議冲識方正以無忒恩遇寵待而隆厚咸用標次以彰厥善其有踈畧差戾受嗤於作者構虛失實有紊乎書法乃至以鄙淺之識貽叨據之誚亦用參紀申儆于後其有

注錄之部次譜籍之名學方志之辨析世績之敷述皆
司籍之事資博聞之益咸用綴緝以成倫要凡國史部
十有三門

選任 公正 恩獎

選任

自軒轅之世即置史官蒼頡沮誦實居其職爾後夏終
商摯周任佚籀秦胡母氏漢司馬遷皆司記事之任竝
有良史之目逮于後漢乃命鴻碩入直東觀撰述國史

謂之著作歷代而下其選彌重或以文學為時主之稱或以才識因名臣之薦至有成書於外郡終老於冊府其所寄任亦可知也然則胡母而上不聞司馬父子是謂私作今之論著以班固為之首

後漢班固明帝時為蘭臺令史與前睢陽令陳宗長陵令尹敏司隸從事孟冀共成世祖本紀遷為郎典校秘書固又撰功臣平林新市公孫述事作列傳載紀二十八篇奏之帝乃復使終成前所著書

劉珍安帝時為謁者僕射永寧元年詔珍與校書劉駒
駘作建武以來名臣傳

李尤為諫議大夫受詔與謁者僕射劉珍等俱撰漢記
劉駒駘臨邑侯復子也駒駘及從兄平望侯毅竝有才
學永寧中鄧太后召毅及駒駘入東觀與謁者僕射劉
珍著中興以下名臣烈士傳

張衡字平子南陽人少善屬文安帝雅聞衡善術學公
車特徵拜郎中再遷為太史令順帝初再轉復為太史

令自去史職五載復還先是永初中謁者僕射劉珍校書郎劉駒駭等著作東觀撰著漢記因定漢家禮儀上言請衡參論其事會並卒而衡常歎息欲終成之

馬融桓帝時為南郡太守免官復拜議郎在東觀著述邊韶字孝先陳留浚儀人以文學知名桓帝時為臨潁侯相徵拜大中大夫著作東觀

伏無忌為侍中屯騎校尉元嘉中詔無忌與黃景崔寔等共撰漢記

崔寔為大將軍梁冀司馬與邊韶延篤等著作東觀

延篤

傳又載篤為議郎與朱穆邊韶共著作東觀

楊彪靈帝熹平中以博習舊聞公車徵拜議郎與馬日磾盧植蔡邕等著作東觀

荀悅為黃門侍郎獻帝好典籍嘗以班固漢書文繁難省乃令悅依左氏傳體以為漢紀三十篇詔尚書給筆札辭約事詳論辨多美

吳韋曜為黃門侍郎廢帝即位諸葛恪輔政表曜為太

史令撰吳書

華覈為左國史後主時覈上疏曰臣聞五帝三王皆立史官叙錄功美垂之無窮漢時司馬遷班固咸命世大才所撰精妙與六經俱傳大吳受命建國南土大皇帝末年命太史令丁孚郎中項峻俱非史才其所撰作不足紀錄至少帝時更差韋曜周昭薛瑩梁廣及臣五人訪求往事所共撰立備有本末昭廣先亡曜負恩蹈罪瑩出為將復以過徙其書遂委滯迄今未撰奏臣愚淺

才劣適可為瑩等記注而已若使撰合必襲字峻之跡
懼陸大皇帝之元功損當時之盛美瑩涉學既博文章
尤妙同寮之中瑩為冠首今見吏雖多經學記述之才
如瑩者少是以慄慄為國惜之實欲使卒垂成之功編
於前史之末奏上之後退填溝壑無所復恨後主遂召
瑩還為左國史

晉傅玄魏末為郎中與東海繆施俱以時譽選入著作
撰集魏書

華嶠惠帝元康初為尚書後以嶠博聞多識屬書典實
有良史之志轉秘書監中書散騎著作及治禮音律天
文數術南省文章門下撰集皆典統之

華暢嶠少子也嶠漢書十典未成秘書監繆徽奏暢為
著作佐郎卒成十典

虞預為著作郎除散騎常侍仍領著作著晉書四十餘
卷

于寶為著作郎時中興草創未置史官中書監王遵上

疏曰夫帝王之迹莫不秘書著為令典垂之無窮宣皇帝廓定四海武皇帝受禪于魏至德大勳等蹤上聖而紀傳不存於王府德音未被乎管絃陛下聖明當中興之盛宜建立國史撰集帝紀上敷祖宗之烈下紀佐命之勳務以實錄為後代之準厭率土之望悅人神之心斯誠雍熙之至美王者之弘基也宜備史官勅佐著作郎干寶等漸就撰集元帝納焉寶於是始領國史

王隱字處叔陳郡人建興中過江太興初元帝召隱及

郭璞俱為著作郎今撰晉史

朱鳳晉陵人吳震吳人單族有史才秘書監華譚薦二人擢補著作佐郎竝皆稱職

謝沉除尚書度支郎何充庾冰竝稱沉有史才遷著作郎撰晉書三十餘卷

徐廣東筦人孝武時為員外散騎常侍領著作尚書奏曰左史述言右官書事乘志顯於晉鄭春秋著乎魯史自聖代有造中興記者道風帝典煥乎史策而太和以

降世歷三朝玄風聖迹儵為疇古臣等參詳宜勅著作
郎徐廣撰成國史於是勅廣撰集焉遷驍騎將軍領徐
州大中正轉正員常侍大司農仍領著作如故勒成晉
紀上之因乞解史任不許

宋王韶之琅邪臨沂人私撰晉陽秋成時人謂之宜居
史職即除著作郎使續後事

裴松之為尚書部郎仁威記室參軍出為諸暨令元嘉
中受詔續何承天宋史未及成而卒

何承天元嘉十六年除著作佐郎撰國史

荀伯子少好學博覽經傳為員外散騎侍郎著作郎徐
廣重其才學舉伯子及王韶之竝為佐郎助撰晉史

南齊丘巨源少舉丹陽郡孝廉為宋孝武所知大明五年
勅助徐爰撰國史

檀超為散騎常侍司徒右長史建元二年初置史官以
超與驃騎記室江淹掌史職

王思遠高宗時為侍中掌優策及起居注

梁任孝恭以外祖丘它與高祖有舊高祖聞其有才學
召入西省撰史

裴子野撰宋畧成吏部尚書徐勉言之於高祖以為著
作郎掌國史及起居注除通直正員外郎著作如故勅
使撰方國使圖

周興嗣天監中為員外散騎侍郎佐撰國史十二年遷
給事中撰史如故

劉杳天監初為太學博士佐周捨撰國史至大通初為

東宮通事舍人勅代裴子野知著作郎

陸雲公為尚書儀曹郎頃之即入直壽光省以本官知著作郎事俄除著作郎累遷中書黃門郎竝掌著作

沈峻為五經博士時中書舍人賀琛奉勅撰梁史乃啓峻及孔子祛補西省學士助撰錄書成入兼中書通事舍人

後魏鄧穎為中書侍郎太武詔太常崔浩集諸文學撰述國書穎與浩弟覽等俱參著作事

崔浩為光祿大夫太武詔浩曰昔皇祚之興世隆北土
積德累仁多歷年載澤流蒼生義聞四海我太祖道武
皇帝協順天人以征不服應期撥亂奄有區夏太宗承
統光隆前緒釐正刑典大業維新然荒域之外猶未賓
服此祖宗之遺志而貽功于後也朕以眇年獲奉宗廟
戰戰兢兢如臨深谷故即位之初不遑寧處揚威朔裔
掃定赫連逮于神麀始命史職注集前功以成一代之
典自爾以來戎旗仍舉秦隴尅定徐兗無塵平遁寇於

龍川討孽豎於涼域豈朕一人獲濟於此賴宗廟之靈
群公卿士宣力之效也而史闕其職篇籍不著每懼斯
事之墜焉公德冠朝列言為世範小大之任望君存之
命公留臺綜理史務述成此書務從實錄浩於是監秘
書事以中書侍郎高允散騎侍郎張偉參著作續成前
紀至於損益褒貶折衷潤色浩所摠焉

高允與司徒崔浩述成國記以本官領著作郎

陰仲達武威姑臧人少以文學知名司徒崔浩啓仲達

與段承根云二人俱涼土才華同修國史除秘書著作郎

段承根好學機辯有文思而性疎薄司徒崔浩見而竒之以為才堪著述言之太武請為著作郎引以同事

高讜為游擊將軍與崔浩共參著作遷中書侍郎

程駿為著作郎獻文皇帝中除密郡太守尚書李敷奏曰夫君之使臣必須終効駿實史才方申直筆千里之任十室可有請留之數載以成前籍後授方伯愚以為

允書奏從之

李輔字伯尚少有重名孝文每云此李氏之千里駒勅撰太宗起居注尋遷秘書丞

韓顯宗為著作郎孝文曾謂顯宗及程靈虬曰著作之任國言是司卿等之才朕自委悉中省之品卿等所聞若取之古人班馬之徒固自遼闊若求當代文學之能卿等應推崔孝伯

袁翻少以才學擅美一時宣武景明初李彪在東觀翻

為徐紇所薦彪引兼著作佐郎以參史事

游雅字伯度為東雍州刺史徵為秘書監委以國史之

任

崔光本名孝伯字長仁為著作郎與秘書丞李彪參撰
國書宣武初為侍郎初光與李彪共撰國書太和之末
彪改著作專以史事任光彪尋以罪廢宣武居諒闇彪
上表求成魏書詔許之彪遂以白衣於秘書省著述光
雖領史官以彪意在專功表解侍中著作以讓彪宣武

不許

李彪字道固為秘書丞分領著作事

于忠為衛尉卿詔與吏部尚書元暉度支尚書元康河
南尹元萇等推定歷代姓族

李琰之為彭城王勰行臺參軍尋為侍中李彪啓著作
郎修國史累轉黃門郎修國史

房景先為員外郎侍中穆紹啓景先撰世宗起居注

陽休之莊宗時為輕車將軍李神雋監起居注休之與河

東裴伯茂范陽盧元明河間邢子明等俱入撰次後為
太保長孫稚府屬尋勅與魏收李同軌等修國史

北齊杜臺卿字少山文筆尤工見稱當世以中書黃門
侍郎兼大著作修國史

魏收字伯起後魏節閔時為散騎侍郎尋勅典起居注
并修國史後為神武府屬崔暹言於文襄曰國史事重
公家父子霸王功業皆須具載非收不可文襄啓收兼
散騎常侍修國史武定二年除正常侍領兼中書侍郎

仍修史神武謂收曰卿勿見陳元康等在吾目下趨走
謂吾以為勤勞我世身名在卿手勿謂我不知尋加兼
著作郎天祐元年除中書令兼著作郎二年詔撰魏史
帝使收專其任又詔平原王高隆之摠監之署名而已
帝勅收曰好直筆我終不作魏太武誅史官

孫寧字彥舉少厲志勤學為國子助教太保崔光引修
國史

權會文義該洽兼明風角玄象被尚書符追著作修國

史監知太史局事

後周柳虬為秘書丞時秘書雖領著作不參史事自虬為丞始令監掌焉

隋姚察仕陳累遷戎昭將軍知撰梁史事後主纂業勅兼東宮通事舍人將軍知撰史如故高祖開皇九年詔授秘書丞別勅成梁陳二代史

薛德音道衡之從子有雋才起家為游騎尉佐魏澹修魏史成遷著作郎

劉炫河間人少以聰敏見稱為郡禮曹從事以吏幹

知名奉勅與著作郎王劭同修國史

初劭為著作佐郎以母憂去職

在家著齊書時制禁私撰史為內史侍郎李元操所奏帝怒遣使收其書覽而悅之於是起為員外散騎

侍郎修起居注

劉焯以儒學知名舉秀才射策甲科與著作郎王劭同

修國史

潘徽為晉王揚州博士煬帝嗣位詔徽與著作佐郎陸

從典太常博士褚亮歐陽詢等助越公楊素撰魏書會

素薨而止

唐蕭瑀為中書令武德五年十二月詔曰司典序言史
官記事考論得失究盡變通所以裁成義類懲惡勸善
多識前古貽鑒將來伏羲以降周秦斯及兩漢相傳三
國竝命迄于晉宋載籍備焉自有魏南徙乘機撫運周
隋禪代歷世相仍梁氏稱邦跨據淮海齊遷龜鼎陳建
宗祊莫不自命正朔繇歷歲祀各殊徽號刪定禮儀至
於發跡開基受終告代嘉謀善政名臣奇士立言著績

無乏於時然簡牘未編紀傳咸闕炎涼已積謠俗遷訛
餘烈遺風汎焉將墜朕握圖馭宇長世字民方立典謨
永垂憲則顧彼湮落用深軫悼有懷撰次實資良直中
書令蕭瑀給事中王敬業著作郎殷聞禮可修魏史侍
中陳叔達秘書丞令狐德棻太史庾儉可修周史兼中
書令封德彝中書舍人顏師古可修隋史大理卿崔善
為中書舍人孔紹安太子洗馬蕭德言可修梁史太子
詹事裴矩兼吏部郎中祖孝孫前秘書監魏徵可修齊

史秘書監竇璵給事中歐陽詢秦王文學姚思廉可修
陳史務加詳覈博採舊文義在不刊書法無隱

房玄齡為司空貞觀二十年詔宜令修國史所更撰晉
書詮次舊文裁成義類俾夫湮落之誥咸使發明其有
所須可依修五代史故事若少學士亦量追取於是房
玄齡與中書令褚遂良太子左庶子許敬宗掌其事又
召中書舍人來濟著作郎陸元仕劉子翼守主客郎中
盧承基太史令李淳風太子舍人李義府薛元超起居

郎上官儀主客員外郎崔行功刑部員外郎辛玄馭著作佐郎劉喬之光祿主簿楊仁卿御史主簿李延壽校書郎張文恭竝當時屬文士分功撰錄

許敬宗為中書令敬宗先受詔與中書侍郎許圜師太史令李淳風著作佐郎楊仁卿著作郎顧喬等撰貞觀二十三年已後至顯慶三年實錄顯慶四年二月撰成二十卷

劉仁軌為左庶子同中書門下三品咸亨四年三月詔

仁軌與吏部侍郎同中書門下三品李敬玄中書侍郎
郝處俊黃門侍郎高如周等並修國史仁軌等於是引
左史李仁實專掌其事

武三思為特進則天長安三年正月勅宜令三思與納
言李嶠正諫大夫朱敬則司農少卿徐彥伯鳳閣舍人
魏知古崔融司封郎中徐堅左史劉知幾直史館吳兢
修唐史採四方之志成一家之言長懸楷則以貽勸誡
魏元忠為中書令神龍元年十二月制左散騎常侍靜

德郡王武三思與元忠及禮部尚書祝欽明及史官太常少卿徐彥伯秘書少監柳冲國子司業崔融中書舍人岑羲徐堅等修則天實錄

吳兢勵志强學博通經史魏元忠朱敬則居相輔薦兢有史才堪居近侍因令直史館修國史累遷右補闕與韋承慶崔融劉子玄撰則天實錄

張說為并州大都督府長史開元八年詔曰肇有書契是興簡冊所以彰平得失示以懲勸非夫詳而有體辨

而不華含陽秋之蘊摠墳誥之蹟豈能光我司典崇其
立言石羽林軍將軍攝御史大夫權檢校并州大都督
府長史持節天平軍節度大使燕國公張說多識前志
學于舊史文成微婉詞潤金石諒可以昭振風雅光揚
軌訓可兼修國史仍齋史本就并州修撰

柳芳肅宗朝為史官與同職韋述受詔添修吳兢所撰
國史未竟而亡

于休烈為工部侍郎修國史宰臣李揆嫉之改為國子

祭酒休烈性本淳謹怡然自適代宗即位甄別名品宰
臣元載稱之乃拜右散騎常侍依前兼修國史

令狐峘博貫羣書有口辯楊綰為禮部侍郎修史引入
史館自華原尉拜拾遺累遷禮部侍郎貶衡州別駕貞
元初李泌為相召拜右庶子史館修撰又貶吉州別駕
監修國史奏峘所撰代宗實錄一分請於貶所畢功

張薦字孝舉少精史傳大歷中浙西觀察使李涵表薦
其才可掌史任乃詔授左司禦率府兵曹參軍既至關

下以母老疾不拜命母喪闋禮部侍郎于幼舉前事以
聞召充史館修撰兼陽翟尉累遷工部侍郎卒薦聰明
強記無不通貫自始命至嘗兼史館修撰在史館二十
餘年

蔣乂初名武貞元九年自前河南府王屋縣尉為右拾
遺史館修撰德宗重難其職制未下前召見於延英殿
方命官元和四年為秘書少監兼史館修撰奉詔與獨
孤郁韋處厚同修德宗實錄

路隨為翰林侍講學士諫議大夫韋處厚為中書舍人
長慶二年十月勅隨處厚嘗在史館才行可稱伏以憲
宗實錄未修灼資論撰宜兼充史館修撰仍分日入史
館修實錄未畢之間且許不入內署仍放朝參

沈傳師為翰林學士中書舍人史館修撰預修憲宗實
錄長慶三年出為湖南觀察使中書侍郎平章事監修
國史杜元穎奏臣自去年奉詔命各據見在史官分修
憲宗實錄今緣沈傳師改官若更求人選擇非易其沈

傳師當分雖搜羅未周條目紀綱已粗有緒竊以班固居鄉里而繼成漢書陳壽處私家而專精國志玄宗國史張說在本鎮兼修代宗編年令狐峘自外郡奏上遠考前代近參本朝皆可明徵實有成例其沈傳師一分伏望勅就湖南修畢先送史館與諸史官參詳然後聞奏庶使官業責成有終始之效傳聞撫實無同異之差制可

蔣係乂子也太和二年為右拾遺史館修撰與同職沈

傳師鄭瀚陳夷行李漢等奉詔撰憲宗實錄四年書成
奏御轉尚書工部員外郎遷本司郎中皆兼史職

宇文籍以咸陽尉直史館與韓愈同成順宗實錄遷監
察御史後又為駕部員外郎史職與韋處厚路隨沈傳

師同修憲宗實錄

王彥威為諫議大夫太和六年二月以彥威及戶部郎
中楊漢公祠部員外郎蘓滌右補闕裴休竝以本官充

史館修撰

故事史官不過三員少或止於兩
員至是四人竝命時論深以為非

李讓夷為諫議大夫開成元年四月以讓夷竝權知起居舍人事先是宰臣於閣內奏起居舍人李襄有痼疾請替帝曰朕聞楮遂良為諫議大夫嘗兼此官卿可盡言今諫議大夫姓名宰臣李石遂奏李讓夷馮定孫簡蕭倣帝曰讓夷可也

孟穆為戶部郎中大中八年七月監修鄭郎奏當館修撰直館共四員准故事以通籍者為直館伏以修史重事合選廷臣秩序或卑筆削不稱其直館伏請停廢更

添修撰二員從之其舊直館萬年尉張範涇陽尉李節
勒守本官以穆及駕部員外郎李渙竝充修撰通舊為
四員分修四季之事

蔣偕有史才為補闕史館修撰咸通中與同職盧耽牛
藪等受詔修文宗實錄

柳玘為吏部侍郎昭宗大順中宰相監修國史杜讓能
以宣宗懿宗僖宗三朝實錄未修乃奏玘及右補闕裴
廷裕左拾遺孫泰駕部員外郎李商太常博士鄭光庭

等十五人分修之

後唐張昭長興四年七月以前都官員外郎知制誥史館修撰復為尚書職方員外郎依前知制誥著作郎直史館張守吉為右補闕竝充史館修撰著作佐郎尹拙為左拾遺王慎徽為右拾遺竝依前直史館國朝舊事以本官直館者皆為畿縣尉今以諫官直史館自拙等始從監修國史李愚奏也

晉趙瑩為相監修國史天福六年二月勅曰有唐遠自

高祖下暨明宗紀傳未分書志或闕今耳目相接尚可
詢求若歲月更深何由尋訪宜令戶部侍郎張昭起居
郎賈緯秘書少監趙熙吏部侍郎鄭受益左司員外郎
李為光等修撰唐史仍令宰臣趙瑩監修其年四月瑩
奏所修唐史首尾二十一朝絲歷三百餘載其於筆削
斯實難辦必藉羣才司分事任張昭等五人奉勅同撰
內起居郎賈緯丁憂去官竊以刑部侍郎呂琦侍御史
尹拙皆富典墳嘗親簡牘勸善懲惡雅符班馬之規廣

記備言必稱董南之職上祈聖鑒俾共編修詔從之以
琦為戶部侍郎以拙為倉部員外郎與張昭等同修唐
史

漢賈緯為諫議大夫乾祐二年二月勅曰載唐虞之盛
傳彼古文明得失之由存乎信史恭惟高祖皇帝受天
歷數纘漢基圖戎虜蠻夷懾靈旗而內附禮樂征伐建
王道於大中功格於上玄化行乎率土將欲示其軌範
約彼春秋接高光紀聖之書續班馬紀言之典廢而不

舉闕孰甚焉左諫議大夫賈緯左拾遺竇儼右拾遺王
紳等才學淵深論辯蜂起分職方提於直筆編年允屬
於鴻儒宜令緯等同修高祖實錄呈進仍令宰臣蘇逢
吉監修

周張昭為兵部尚書顯德三年十二月初太祖聖皇帝
實錄并梁均帝唐清泰二主實錄宜差張昭修宜同修
官委張昭定名奏請四年正月昭上言奉勅編修太祖
實錄及唐梁二末主實錄今請國子祭酒尹拙太子詹

事劉溫叟同於史館編修

公正

夫簡牘之興得失攸紀善惡無隱曲直遂分是故勸沮於斯人見信於來裔其或紀言動之任舉春秋之旨雖微婉之斯在亦纖芥之必書故使胥矣之言足徵於龜鑑直哉之筆若列於日星斯蓋得執簡之餘芳書法之遺懿者已

董狐為晉太史晉趙穿襲殺靈公於桃園

虞翻曰

而迎

趙盾趙盾素貴得民知靈公少侈民不附故為弑君盾
復位晉太史董狐書曰趙盾弑其君以視於朝盾曰弑
者趙穿我無罪太史曰子正卿而亡不出境反不能誅
國亂非子而誰孔子聞之曰董狐古之良史書法不隱
不隱盾
之罪 宣子良大夫也為法受惡聞義則服杜預曰惜
言其為法受屈也
也出疆乃免

齊太史

失姓
名

崔杼弑其君莊公光立景公而相之太史

書曰崔杼弑其君崔子殺之其弟嗣書而死者二人

續嗣

也并前有
三人死
其弟又書乃舍之南史氏聞太史盡死執簡

以徃聞既書矣乃還

傳言齊有史崔杼之罪所以聞

吳韋曜為孫皓侍中領任國史皓欲為父和作紀曜執以和不登帝位宜名為傳如是者非一漸見責怒

晉孫盛歷著作郎秘書監著晉陽秋詞直理正稱良史焉既而大司馬桓溫見之怒謂盛子曰枋頭誠為失利何至乃如尊君所說若此史遂行自是闕君門戶事其子遽拜謝因請刪改之時盛年老還家性方嚴有軌憲

雖子孫斑白而庭訓愈峻至此諸子乃共號泣稽顙請
為百口切計盛大怒諸子遂爾改之盛寫兩定本寄于
慕容雋大元中孝武帝博求異聞始於遼東得之以相
考校多有不同書遂兩存焉

趙泉車敬俱為苻堅著作郎堅母少寡將軍李威有辟
陽之寵史官載之堅收起居注及著作所錄而觀之見
其事慙怒乃焚其書而大檢史官將加其罪泉敬等已
死乃止

宋王韶之為黃門侍郎領著作韶之為晉史序王詢貨
殖王欽作亂詢子弘欽子華竝貴韶之懼為所陷深結
徐羨之傅亮南齊劉祥為長沙王鎮軍權誥議參軍撰
宋書譏斥禪代尚書令王儉密以啓聞帝銜而不問

後周柳虬為西魏秘書監修起居注太祖既廢魏帝立恭

帝大饗羣臣虬執簡書於朝曰廢帝文皇帝之嗣子年七

歲文帝言於安定公即周太祖曰是子才絲于公不才亦絲于

公宜勉之公既受茲重寄居元輔之任又納女為皇后遂

不能訓誨有成致令廢黜負文皇帝付囑之意此咎非安
定公而誰太祖乃令太常盧辨作誥諭公卿曰嗚呼我羣
后暨衆士維文皇帝以襁褓之嗣托於予訓之誨之庶厥
有成而予罔能弗變厥心庸此乎廢墜我文皇帝之志嗚
呼茲咎予其焉避予實知之矧爾衆人之心哉惟予之顏
豈惟今厚將恐來世以予為口實

唐杜正倫太宗貞觀二年為給事中兼知起居注太宗
嘗謂侍臣曰朕每日坐朝欲出一言即思此言於百姓

有利益不所以不敢多言正倫進曰君舉必書言存左
史臣職當修起居注不敢不盡愚直陛下若一言乖於
道理則千載累於聖德非直當今有損於百姓願陛下
慎之太宗大悅賜絲絹二百疋

褚遂良為諫議大夫知起居注貞觀十六年四月太宗
謂遂良曰卿知起居注書何等事大抵人君得見否遂
良曰今之起居古之左右史書人君言事且記善惡以
為鑒誠庶幾人主不為非法不聞帝王躬自觀史太宗

曰朕有不善卿必記之耶遂良曰守道不如守官臣職當載筆君舉必記黃門侍郎劉洎曰設令遂良不記天下之人皆記之矣太宗曰然七月太宗又謂遂良曰爾知起居比來記我行事善惡遂良曰今四海太平為行事耳然史官之設君舉必書善既必書過亦無隱

吳兢開元中為著作郎兼修史時黃門侍郎同中書門下平章事張說因至史館讀則天實錄見論證對魏元忠事乃謂兢曰劉五修實錄劉五即元也論齊魏公事殊不

相饒假與說毒手當時說驗知是兢書之所以假託於
劉子玄兢從容對曰是兢書之非劉公修述草本猶在
其人已亡不可誣枉於幽魂令相公有怪耳同修史官
蘇宋等見兢此對深驚異之乃歎曰若取人情何名為
直筆

于休烈為太常少卿修國史至德二年肅宗謂休烈曰
君舉必書朕有過卿書之否休烈對曰臣聞禹湯罪已
其興勃焉有德之君不忘書過臣不勝大慶

鄭朗為起居郎太和九年十二月文宗御紫宸殿與宰
臣鄭覃李石等議政宰臣既退帝命朗等適所記錄者
將來一觀朗對曰臣執筆所記便目為史臣聞自古帝
王不合觀史帝曰故事何在朗曰臣不敢遠徵故實嘗
聞太宗皇帝欲親覽國史用知得失諫議大夫朱子奢
上表云史官所述義歸盡善若至曾玄已後或非上智
中主庸君飾非護短見極陳善惡恐致史官何地逃刑
又聞褚遂良對曰今之起居古之左右史以記人君言

行善惡必書庶幾不為非法不聞帝王躬自觀史帝又謂朗曰適來所記是且直書未有否臧一見無爽朗乃進所紀帝畧覽曰卿宜門外重寫錄進來其日晚內出詔宣示宰臣曰適來鄭朗等奏朝來所紀之事擬不進夫人君之言良史善惡必書或有平生之間話不關理道之體要垂諸將來實為愧恥異日臨朝庶幾稍改何妨一見以戒醜言

魏謩為起居舍人開成四年十月文宗於紫宸殿對百

察遣閣門使就謬取注記謬奏曰臣以自古置此以為
聖王鑒戒陛下但為善事勿冀臣不書如陛下所行錯
誤臣不書之天下之人皆得書之臣以陛下為太宗文
皇帝乞陛下許臣比職褚遂良帝曰我向前亦曾取者
謬曰自是向前起居不詳故事臣今豈得陷陛下為非法
若陛下覽之後自此文字須有迴避如此則善惡不
直非史也遺後代何取信遂止

恩獎

軒后以史名官晉卿因籍命氏文籍既興官守攸重其所繇來遠矣逮乎漢氏之世則天下計書先上太史副上丞相其後列鴻都藏室之署分東觀秘府之局典司著撰裁正編簡鼎國江左以迄于五代未嘗不建官分職克慎其選焉蓋髦士俊民乘時間作而當世之君莫不隆其禮命形於詔獎或蕃錫加等或崇進異數以至推恩而延賞追美以飾終發乎嘆想形於悼惜蓋夫鴻碩之老良直之士所任重而其才難不可以不欽尚者

後漢高彪除郎中校書東觀遷內黃令帝勅同僚臨送
祖于上東門詔東觀畫彪形像以勸學者

吳華覈遷東觀令領右國史覈上疏辭讓後主答曰得
表以東觀儒林之府當講校文藝處定疑難時皆名學
碩儒乃任其職乞更選英賢聞之以卿研精墳典博覽
多聞可謂悅禮樂敦詩書者也當飛翰騁藻光贊時事
以越揚班張蔡之儔怪乃謙光厚自菲薄宜勉修所職
以邁先賢勿復紛紛

梁蕭子雲為太子舍人撰東宮新記奏之勅賜束帛
陳杜之偉為大匠卿遷大中大夫仍勅撰梁史永定三
年卒高祖甚悼惜之詔贈通直散騎常侍賻錢五萬布
五十疋棺一具尅日舉哀

後魏韓顯宗為著作佐郎孝文曾謂顯宗及程靈虬曰
著作之任國史是司卿等之文朕自委悉中省之品卿
等所聞若欲取况古人班馬之徒固自遼闊若求之當
世文學之能卿等應推崔孝伯又謂顯宗曰見卿所撰

燕志及在齊詠大勝比來之文

北齊魏收散騎常侍修國史武定三年除正常侍領兼
中書侍郎仍修史神武謂收曰卿勿見陳元康等在吾
目下趨走謂吾以為勤勞我世身名在卿手勿謂我不
知尋加兼著作郎

隋郎茂大業中為尚書左丞撰州都圖經一百卷奏之
賜帛三百段

裴矩為吏部尚書大業初西域諸蕃塞與中國互市場

帝遣矩監其事矩撰西域圖三卷入朝奏之帝大悅賜物五百段

唐房玄齡為左僕射貞觀十年正月與侍中魏徵散騎常侍姚思廉太子右庶子李百藥孔穎達守禮部侍郎令狐德棻守中書侍郎岑文本中書舍人許敬宗等撰成周隋陳齊梁等五代史詣闕上之太宗勞之曰朕觀前代史書彰善癉惡足為將來之戒秦始皇奢淫無度志存隱惡焚書坑儒用絨談者之口隋煬帝雖好文儒

尤疾學者前世史籍竟無所成數代之事殆將泯絕朕意則不然將欲覽前王之得失為在身之龜鏡公輩以數年之間勒成五代之史深副朕懷極可嘉尚於是進級班賜各有差

高士廉為吏部尚書貞觀十二年與黃門侍郎韋挺禮部侍郎令狐德棻兼中書侍郎岑文本撰氏族百卷太宗稱善頒賜進級各有差

敬播為著作郎與司空房玄齡給事中許敬宗貞觀十

七年上所撰高祖今上實錄各二十卷玄齡以下班賜進級各有差

褚遂良為中書令貞觀二十年詔修晉書以司空房玄齡及遂良太子左庶子許敬宗掌其事又詔中書舍人來濟著作郎陸元仕劉子翼守主客郎中盧承基太史令李淳風太子舍人李義府薛元超起居郎上官儀主客員外郎崔行功刑部員外郎辛元馭著作佐郎劉喬之光祿主簿楊仁卿御史主簿李延壽校書郎張文恭

竝當時屬文之士分功撰錄莫不博考前文傍求遺逸
芟夷繁雜舉其精要又令前雅州刺史令狐德棻太子
司議郎敬播主客員外郎李懷安屯田員外郎李懷儼
詳其條例重加考正以臧榮緒晉書為本摭摭諸家傳
記而附益之數載而書就頒賜加級各有差

長孫無忌為太尉受詔與史官同續修貞觀實錄永徽
五年閏五月畢功詣闕表上之起貞觀十五年至二十
三年五月勒成二十卷帝覽而歎歎無忌等賜爵加級

布帛各有差

于志寧為太子太傅尚書左僕射先詔太尉長孫無忌
與志寧及中書令兼太子詹事崔敦禮與禮官國子祭
酒崇賢館文士令狐德棻中書侍郎兼檢校右庶子弘
文館學士李義府著作郎崇賢館學士劉喬之著作郎
楊仁卿起居郎弘文館直學士顧裔符璽郎李延壽兼
秘書郎弘文館直學士張文恭等修撰國史依紀傳之
體凡八十一卷顯慶元年七月勒成無忌等詣闕上之

詔無忌已下加爵賜布有差

許敬宗為中書令與中書侍郎許圜師著作郎楊仁卿等受詔撰貞觀二十三年以後至顯慶三年至公凡成二十卷顯慶四年二月畢功奏上之封敬宗子曰為新城縣男國子祭酒令狐德棻進封彭陽縣公中書侍郎許圜師封平恩縣公太史令李淳風封昌樂縣男著作郎北平縣男楊仁卿著作郎餘杭縣男顧裔竝加朝議大夫竝賞修實錄之功也

李延壽為符璽郎撰南北史一百八十卷卒高宗詔曰
故符璽郎李延壽藝文該洽材兼良史撰政典一部詞
殫直筆雖其人已亡功有可錄宜賜其家絹五十疋仍
令詳正所寫兩本付秘書一本賜皇太子

武三思為左散騎常侍靜德郡王與中書令齊國公魏
元忠禮部尚書魯郡公祝欽明及史官太常少卿徐彥
伯秘書少監柳冲韋承慶國子司業崔融中書舍人岑
義徐堅撰則天大聖皇后實錄為三十卷編次文集一

百二十卷神龍二年五月奏之帝稱善降璽書勞問三
思賜物二千段魏元忠賜物千段仍封其子衛王諮議
參軍昇為任城縣男祝欽明進爵魯國公賜物八百段
徐彥伯等各賜爵二等賚物五百段

竇懷貞為左僕射與侍中魏知古中書令蕭至忠崔湜
中書侍郎陸象先左散騎常侍柳沖太子詹事徐堅左
庶子劉子元先天二年三月奏上所修姓族系錄二百
卷懷貞已下加爵賜物各有差

劉子玄為左散騎常侍修國史開元四年與吳兢撰則
天寶錄四十卷成以聞又引古義白於執政宰相姚崇
奏曰伏見貞觀十七年監修國史房元齡與史官給事
中許敬宗著作佐郎敬播修高祖實錄二十卷成制封
玄齡一子為縣男賜物一千段敬宗一子為高陽縣男
賜物七百段敬播改授太子司議郎賜物五百段仍竝
降璽書褒美又神龍二年五月監修國史中書令魏元
忠與史官太常少卿徐彥伯國子司業崔融等修則天

實錄三十卷成制封元忠一子為縣男賜物一千段彥
伯等各賜爵二等物五百段自餘卑官加兩階物段准
處分仍竝降璽書褒美今史官劉子玄吳兢等撰睿宗
實錄又重修則天中宗實錄竝成進訖准撰太宗實錄
例益修官已下加爵及賜命子元等經臣援引古今欲
臣聞奏臣謹尋故事例有恩賞事屬當時不可為準子
玄等始末修撰誠亦勤勞叙事紀言所緣雖重承恩賞
賜固不在多子元吳兢望各賜物一百段許之

一云子元以修

則天實錄封
言葉縣子

吳兢神龍中與韋承慶劉子元等撰則天實錄成轉起居郎俄遷水部郎中丁憂還鄉里開元三年服闋抗疏言曰臣先修史已成數十卷自停職家貧無紙札乞終餘功乃拜諫議大夫依前修史開元六年七月表乞典郡曰臣自掌史東觀十有七年歲序徒淹勤勞莫著不能勒成大典垂誠將來顧省微躬久妨賢路乞罷今職別就他官至於治人之政在兢尤所詳曉望令試典一

郡刺舉外臺必當効績循良不負朝寄又兢父致仕已來俸料斯絕所冀祿秩稍厚甘脆有資烏烏之誠幸垂矜察帝親札報曰天子臨書是為盛業史官秉筆必佇良才著作彊記洽聞時議咸許牧州典郡此類何求豈轉要以從閑乃迴難而就易私願或愜公道若何八年詔其父鄭州長史處敬為鳳州刺史仍聽致仕以兢修國史故也

賈耽為宰相貞元十四年耽獻九州圖并別錄通錄十

卷德宗賜內廐馬一匹錦綵二百疋銀餅盤各一十七
事毓又上海內華夷圖及古今郡國縣道四夷述德宗
覽而善之賜錦綵二百疋袍段六錦帳二銀餅盤各一
銀槓二馬一匹

令狐峘為起居舍人撰玄宗代宗實錄順宗初卒元和
三年以修實錄功追贈工部尚書

裴均監修國史元和五年十二月與諸史官進德宗實
錄五十卷憲宗覽而稱善乃賜均繒錦三百疋及銀器

等以秘書少監史館修撰蔣武

後名

為諫議大夫直史

館密縣尉樊紳為左拾遺內供奉咸陽縣尉韋處厚為
右拾遺內供奉萬年縣丞林寶為太常博士竝仍舊職
李吉甫為宰相元和八年二月進所撰元和州郡圖三
十卷賜錦綵二百疋銀椀盤各一

路隨為翰林侍講學士諫議大夫韋處厚為中書舍人
長慶二年十月勅隨等常在史館才行可稱伏以憲宗
實錄未修切資論撰宜兼史館修撰其學士如故又勅

路隨韋處厚且止後分日入史館修實錄未畢之間且許不入內署仍放朝參至太和四年三月隨以宰相監修國史表上憲宗實錄賜隨及見在史史官司封郎中蘇景裔起居舍人陳夷行屯田員外郎李漢右拾遺蔣係各錦綵銀器有差

王彥威為戶部侍郎判度支撰唐典自武德終永貞成一部七十卷文宗嘉之賜以錦綵銀器

李紳為宰相監修國史會昌三年與修撰官鄭亞等再

修憲宗實錄畢進上賜銀器錦綵有差

魏蕃為中書侍郎平章事監修國史大中八年修文宗實錄四十卷上之史官給事中盧耽太常少卿蔣偕司勳員外郎王湏右補闕盧告膳部員外牛藁皆頒賜銀器錦綵序遷職秩

後唐趙鳳為宰相監修國史天成四年上新修懿祖獻祖太祖紀年錄共二十卷莊宗實錄三十卷鳳及修撰張昭遠呂咸休各賜繒綵銀器等

晉姚顛後唐門下侍郎平章事監修國史清泰三年上
明宗實錄三十卷同修撰官中書舍人充史館修撰張
昭遠授尚書禮部侍郎中書舍人充史館修撰李詳加
中大夫上柱國竝依前充職戶部郎中充史館修撰程
渥授右諫議大夫左拾遺充史館修撰吳承範授左補
闕充職右拾遺直史館楊昭儉授殿中侍御史各頒賜
有差

漢賈緯仕晉為起居郎天福六年奏曰伏覩史館唐高

祖至代宗已有紀傳德宗至文宗亦存實錄武宗至陰
濟廢帝凡六代唯有武宗實錄一卷餘皆闕落臣今采
訪遺文及耆舊傳說編成六十五卷目為唐年補遺錄
以備將來史官修述臣聞裴子野之修宋略爰在梁時
姚思廉之纂陳書乃於唐世咸因喪墜景有研尋皇帝
陛下與日齊明固天縱聖華山歸馬崇文之道已行虎
殿延儒質疑之論斯啓一昨聿宣綸誥精擇史官以李
氏受終想唐年遺事雖追名上號其制相沿而創法定

儀於文或異恐謠俗之訛變致信實以湮沉將緝亡書
以修隆典臣久居職分深恥闕遺今錄淺聞別陳短序
伏冀特迴睿鑒俯念愚衷芸閣蓬山誠莫裨於良直蹄
涔掬土願少助於高深請下有司用當取證帝覽之嘉
歎賜器皿幣帛

趙熙為兵部郎中天福六年與吏部侍郎張昭受詔修
唐史開運中竟畢其功熙授右諫議大夫昭加金紫光
祿大夫進封開國子增食邑二百戶賞筆削之功也云

開運二年史館上新修前朝李氏書賜監修宰臣
劉昫修史官張昭直館王仲等繒絲銀器各有差

周張昭為兵部尚書與太子詹事劉溫叟等顯德五年
撰太祖實錄三十卷上之賜物有差

冊府元龜卷五百五十四

欽定四庫全書

冊府元龜卷五百五十五 宋 王欽若等撰

國史部

採撰

史氏之職舊矣自周衰失官舊章廢秦仲尼因魯史記
之文考其真偽刊而正之以勸戒蓋諸侯之國史也逮
司馬遷承重世之業受成書之託跡三五已來上下數
千載論次其事為一家之言班范繼踵述遵無廢信乎

得良史之體為作者之雄也爾後或被詔著撰或私為
記述乃有特出新意裁成義類追法春秋繫以時月皆
研精極慮各自名家至若煥然垂法著為國典藏在冊
府是謂信史者咸不越子長之矩矱矣其有述雋賢者
舊之美詮高逸貞烈之行第職官之儀秩据記載之遺
逸叙天官五行之占候紀輶軒木鐸之方言著為紀傳
參於志錄者亦史臣之一體也咸附出焉

周孔子明王道七十餘君莫能用故西觀周室論史記

舊聞興於魯而次春秋上記隱下至哀之獲麟約辭文
去其煩重以制義法王道備人事決七十子之徒口受
其傳指為有所譏刺褒諱挹損之文辭不可以書見也
魯君子左丘明懼弟子人人異端各安其意失其真故
因孔子史記具論其語成左氏春秋述

子貢撰越絕書十六卷

尹喜為函關令撰高士老君內傳三卷

鬼谷先生撰老子傳一卷關令尹喜傳一卷

已上並
傳記

漢陸賈為大中大夫換楚漢春秋五卷

司馬遷生龍門

龍門山其東則在今秦州龍門縣北其西則在今同州韓城縣北西河從其中

下流耕牧河山之陽河之北山年十歲則誦古文二十而

南遊江淮上會稽探禹穴窺九疑浮沅湘北涉汶泗講

業齊魯之都觀夫子遺風鄉射鄒嶧

鄒縣名也嶧山也於此行鄉射之禮

困阨鄒薛彭城鄒縣名也過梁楚以歸反為太史令以為漢

繼五帝末流接三代絕業周道既廢秦廢去古文焚滅

詩書故明堂石室金櫃玉板圖籍散亂漢興蕭何次律

令韓信申軍法張蒼為章程叔孫通定禮儀則文學彬彬稍進詩書往往間出自曹參薦蓋公言黃老而賈誼晁錯明申韓公孫弘以儒顯百年之間天下遺文古事靡不畢集太史公仍父子繼纂其職曰於戲於戲嘆聲余維

先人嘗掌斯事顯於唐虞至於周復典之故司馬氏世

主天官至于余乎欽念哉

欽敬也

罔羅天下放失舊聞王

迹所興原始察終見盛觀衰論考之行事略三代錄秦漢上記軒轅下至于茲著十二本紀既科條之矣竝時

異世年差不明作十表禮樂損益律歷改易兵權山川

鬼神天人之際承做通變作八書二十八宿環北辰三

十幅共一轂運行無窮

言衆星共繞北辰諸幅咸歸車轂若文武之臣尊輔天子也

輔弼股肱之臣配焉忠信行道以奉主上作三十世家

扶義倣儻不令已失時立功名於天下作七十列傳凡

百三十篇五十二萬六千五百字為太史公書序略以

拾遺補闕藝成一家言

藝六藝也

協六經異傳齊百家雜語

藏之名山副在京師

藏于山者備亡失也其副二本乃留京師也

以竦後聖

君子遷既死後其書稍出宣帝時遷外孫平通侯楊惲

祖述其書遂宣布焉

又按史記司馬遷自叙云遷父談且卒執遷手而泣曰今漢興海內

一統明主賢君忠臣死義之士余為太史而弗論載余甚懼焉汝其念哉談卒三歲而遷為太史令故述陶唐

以來至于麟止作史記

東方朔為侍郎撰十洲記一卷神異經一卷

劉向為中壘校尉撰戰國策三十卷

揚雄為郎給事黃門撰蜀王本記一卷

後漢班彪為司徒掾才高而好述作遂專心史籍之間

武帝時司馬遷著作史記自太初以後闕而不錄後好

事者頗或綴集時事然多鄙俗不足以踵繼其書

好事者謂

楊雄劉歆陽城衛褚少孫史孝山之徒

彪乃繼採前史遺事傍貫異聞作

後傳數十篇班彪卒子固歸鄉里固以彪所續前史未

詳乃潛精研思欲就其業既而有人上書顯宗告固私

改作國史者有詔下郡收繫京兆獄盡取其家書先是

扶風人蘇郎偽言圖讖事下獄死固弟超恐固為郡所

覈考不能自明乃馳詣闕上書得召見具言固所著述

意而郡亦上其書顯宗甚奇之召詣校書郎除蘭臺令
史與前睢陽令陳宗長陵令尹敏司隸從事孟異共成
世祖本紀遷為郎典校秘書固又撰功臣平林新市公
孫述事作列傳載記二十八篇奏之帝乃復使終成前
所著書固謂自古書契之作而有史官其載籍博矣至
孔氏纂之斷唐堯下訖秦穆唐虞以前雖遺文其語不
經非經典所說故言黃帝顓頊之事未可明也及孔子因魯
史記而作春秋而左丘明論輯其本是以為之傳又纂

異同為國語又有世本錄黃帝以來至春秋時帝王公
侯卿大夫祖世所出春秋之後七國並爭秦兼諸侯有
戰國策漢興代秦定天下有楚漢春秋故司馬遷據左
氏國語采世本戰國策述楚漢春秋接其後事訖于大
漢漢紹堯運以建帝業至於六世史臣乃追述功德私
作本紀編於百王之末廁於秦項之列太初以後闕而
不錄故採纂前記綴輯所聞以述漢書起元高祖終於
孝平王莽之誅十有二世二百三十年綜其行事旁貫

五經上下治道為春秋考紀

春秋考紀
謂帝紀也

表志傳凡百篇

固自永平中始受詔潛精積思二十餘年至建初中乃成當世甚重其書學者莫不諷誦焉又固記諸國風土人俗皆已詳備前書撰建武以後其事異於先者以為西域傳皆安帝命班勇所記云

蔡邕靈帝時為議郎在東觀與盧植韓說等撰補後漢記會遭事流離不及得成及徙朔方居五原因上書自陳奏其所著十意曰朔方髡徒臣邕稽首再拜上書皇

帝陛下臣豈被受陛下尤懇異大恩初繇宰府備數典
域以叔父故衛尉質時為尚書召拜郎中受詔詣東觀
著作遂與群儒竝拜議郎沐浴恩澤承答聖問前後六
年質奉機密趨走目下遂竟端右出相好藩還尹輦轂
旬日之間登躡上列父子一門兼受恩寵不能輸寫心
力以効絲髮之功一旦被章陷沒辜戮陛下天地之德
不忍刀鋸裁臣首領得就于罪父子家屬徙充邊方完
全軀命喘息相隨非臣無狀所敢復望非臣罪惡所當

復蒙非臣辭筆所能復陳臣初決罪洛陽詔獄生出宇
戶顧念元初中故尚書郎張俊坐漏泄事當伏重刑已
出穀門復聽讀鞠詔書馳救一等輸作左校俊上書謝
恩以轉徙郡縣促遣徧於吏手不得頓息舍辭抱悲無
由上達旣到徙所乘塞守烽職在候望憂怖焦灼無心
復能操筆成章致草闕庭誠知聖朝不責臣謝但愚心
有所不竟臣自在布衣嘗以為漢書十志下盡王莽而
世祖以來唯有紀傳無續志者臣所事師故太傅胡廣

知臣頗識其門戶略以所有舊事雖未備悉粗見首尾積累思惟二十餘年不在其位非外史庶人所得擅述天誘其衷得備著作郎建言十志皆當撰錄遂與議郎張華分受之所使元順難者皆以付臣先治律歷以籌策為本天文為驗請太師舊注考校連年往往頗有差舛當須增損乃有施行為無窮法道至深微不敢獨議郎中劉洪密於用策故臣表上與洪共參思圖牒尋繹適有頭角會臣被罪遂放邊野臣竊自痛一為不善使

史籍所闕胡廣所校二十年之思中道廢絕不得究竟
悽悽之情猶以結心不能違望臣初欲須刑竟乃因縣
道具以狀聞今年七月九日匈奴始攻郡監馳縣其時
鮮卑連犯雲中五原一月之中烽火不絕不言四夷相
與合謀所圖廣遠恐遂為變不知所濟郡縣咸懼不守
朝旦臣所在孤危懸命鋒鏑湮滅灰燼呼吸無期誠恐
所懷隨軀腐朽抱恨黃泉遂下設施謹先斃陪刑科條
諸志臣所定者一所當接續者四前志所無臣欲著者

三及經典群書所宜摺據本奏詔書所當依據分別首
自并書章左臣初被考妻子迸竄亡失文書無所按請
加惶怖愁恐思念荒散十分不能識一所識者又恐謬
誤觸冒死罪披散愚情願下東觀推求諸奏參以璽書
以補綴遺闕昭國體章聞之後雖肝腦流離白骨剖破
無所復恨唯陛下省察謹因臨戎長霍園封上臣頓首

死罪稽首再拜以聞

列傳又載邕撰集漢事未見錄以
繼後史適作零紀及十意又補諸

列傳四十二篇因李儼之亂湮滅多不存十意有律歷
意第一禮意第二樂意第三郊祀意第四車服意第五

車書意第六臣欽若
曰餘四意史不載名

荀悅為黃門侍郎獻帝好典籍嘗以班固漢書文繁難
省乃令悅依左氏傳體以為漢紀三十篇詔尚書給筆
札辭約事詳論辨多美

劉艾為侍中撰漢靈獻二帝紀三卷

蔡質為衛尉撰典職式

侯瑾公車徵不至案漢書紀撰中興以後行事為皇德
傳三十篇行於世

劉珍為謁者安帝永平元年詔珍與校書劉騶駘作建武已來名臣傳遷侍中越騎校尉

李尤為諫議大夫受詔與謁者僕射劉珍等俱撰漢記

應奉官至司隸校尉著漢書後述多所述載袁崧書曰事天刑史

記漢書及漢記三百六十餘年自漢後至其時凡七十卷名曰漢書述

趙畢會稽人舉有道不就著吳越春秋十卷

趙岐為太常著吳越春秋

郭憲為光祿勳撰漢武洞冥記一卷

楊孚為議郎撰交州異物志一卷

魏張璠撰後漢紀雖似未成辭藻可觀

孫該字公達彊志好學著魏書

王粲為侍中撰漢末英雄記八卷

魚蒙為郎中撰典略十九卷

袁暉撰獻帝春秋一卷

陰澹為左將軍撰魏紀十二卷

毛范撰呂布本事一卷

孫舒元撰漢魏春秋九卷

蜀譙周入魏封陽城亭侯撰三巴記一卷

吳謝承字偉平權謝夫人弟為武陵太守撰後漢書百餘卷會稽先賢傳伍卷

韋曜為黃門侍郎孫亮即位諸葛恪輔政表曜為太史令撰吳書華覈薛瑩等皆與同後為侍中領左國史孫皓忿怒收付獄曜因獄吏上辭曰囚昔見世間有古歷注其所紀載既多虛無在書籍者亦復錯謬囚尋按傳

記考合異同采耳目所及以作洞紀起自庖犧至于秦漢凡為三卷當起黃武以來別作卷事尚未成又見劉熙所作釋名信多佳者然物類衆多雖得詳究故持有得失而爵位之事又有非是愚以官爵今之急不宜乖誤因自志至微又作官職訓又辨釋名各一卷欲上之繕寫始畢會以無狀幽囚待命泯沒之日恨不上聞謹以先死列狀乞上言秘府於外科取呈內以聞追懼淺蔽不合天聽抱怖省息乞垂哀省矐冀以此求免而皓

更怪其書之紕謬竟身死於囹圄

周昭字恭遠與韋曜薛瑩華覈竝述吳書

萬震為丹陽太守撰荊州異物志一卷

陸凱為左丞相撰雜傳十九卷

胡沖撰吳朝人士品秩狀八卷吳歷六卷

虞禹撰吳士人行狀名品三卷

吳人撰曹瞞傳一卷

晉華嶠遷尚書以博聞多識屬書典實有良史之志轉

秘書監加散騎常侍班同中書寺為內臺中書散騎著作及治禮音律天文數術南省文章門下撰集皆典統之初嶠以漢紀煩穢慨然有改作之意會為臺郎典官制事繇是得徧觀秘籍遂就其緒起于光武終孝獻一百九十五年為帝紀十二卷皇后紀二卷十典十卷傳七十卷譜及三序傳目錄凡九十七卷嶠以皇后配天作合前史作外戚傳以繼末編非其義也故易為皇后紀以次帝紀又改志為典以有堯典故也而改名後漢

書奏之詔朝臣會議時中書監荀勗令和嶠太常張華侍中王濟咸以嶠文質事核有遷固之規實錄之風藏之秘府後太尉汝南王亮司空衛瓘為東宮傳列上通講事獲施行又撰紫陽真人周君傳一卷

張華撰列異傳三卷

束皙為佐著作郎撰晉書帝紀十志并所著三魏人士傳七代通記竝行於世

皇甫謐累徵不起撰帝王世紀年歷高士逸士列女等

傳玄晏春秋竝重於世

又撰韋氏傳三卷

王接為臨汾公相國撰列女後傳七十二人

周處為御史中丞撰集吳書

袁崧為吳郡太守博學有文章著後漢書百篇

祖台之字元辰為侍中光祿大夫撰志怪書行於世

陳術字申伯著益部耆舊傳及志

楊方為高梁太守撰吳越春秋

司馬彪泰始中為秘書郎轉丞作九州春秋以為先王

立史官以書時事載善惡以為沮勸最教世之要也是以春秋不修則仲尼理之關雎既亂則師摯修之前哲豈好煩哉蓋不得已故也漢氏中興訖于建安忠臣義士亦以昭著而時無良史記述煩雜譙周雖已刪除然猶未盡安順以下亡缺者多彪乃討論衆書綴其所聞起于世祖終於孝獻編年二百錄世十二通綜上下旁貫庶事為紀志傳凡八十篇號曰續漢書

陳壽為御史治書撰蜀相諸葛亮集奏之除著作郎撰

魏吳蜀三國志凡六十五篇時人稱其善叙事有良史之才夏侯湛時著魏書見壽所作便壞已書而罷張華深善之謂壽曰當以晉書相付耳其為時所重如此元康七年卒梁州大中正尚書郎范頽等上表曰昔漢武帝詔曰司馬相如病甚可遣悉取其書使者得其遺書言封禪事天子異焉臣等按故治書侍御史陳壽作三國志辭多勸誡明乎得失有益風化雖文豔不及相如而質直過之願垂採錄於是詔下河南尹雒陽令就家

寫其書壽又撰古國志五十篇益部耆舊傳十篇又壽國志云從荆揚來者得陸凱所諫孫皓二十事博問吳人多云不聞凱有此表又按其文殊甚切直恐非皓之所能容忍也或以為凱藏之篋笥未敢宣行病困皓遣重朝省問欲言因以付之虛實難明故不著于篇然愛其指撻皓事足為後戒故鈔列于凱傳左云

虞溥為鄱陽內史撰江表傳卒于洛于渤過江上江表傳於元帝詔藏于秘書

虞預為散騎常侍領著作著晉書七十餘卷會稽日錄
二十篇諸虞傳十二篇皆行於世

王隱字處叔世寒素父銓歷陽令少好學有著述之志
每私錄晉事及功臣行狀未就而卒隱以儒素自守不
交勢援博學多聞受父遺業西都舊事多所諳究建興
中過江丞相軍諮祭酒涿郡祖納雅相知重納好博奕
每諫止之納曰聊用忘憂耳隱曰蓋古人遭時則以功
達其道不遇則以言達其才故否泰不窮也當今晉未

有書天下大亂舊事蕩滅非凡才所能立君少長王都
游宦四方華夷成敗皆在耳目何不述而裁之應仲遠
作風俗通崔子真作政論蔡伯喈作勸學篇史游作急
就章猶行於世便為沒而不朽當其同時人豈少哉而
了無聞皆緣無所述作也故君子疾沒世而無聞易稱
自強不息况國史明乎得失之跡何必博奕而後忘憂
哉納喟然歎曰非不悅于之道力不足也乃上疏薦隱
元帝以草創務殷未遑史官遂寢不報大興初典章稍

備乃召隱及郭璞俱為著作郎令撰晉史著作郎虞預
私撰晉書而生長東南不知中朝事數訪於隱并所著
書竊寫之所聞漸廣是後更疾隱形於言色預既豪族
交結權貴共為朋黨以斥隱竟以謗免黜于家貧無資
用書不成乃依征西將軍庾亮於武昌亮供其紙筆書
乃得成詣闕上之隱雖好著述而文辭鄙拙蕪舛不倫
其書次第可觀者皆人所撰文體混漫義不可解者隱
之作也

孫盛為秘書監給事中著魏氏春秋晉陽秋詞直而理
正咸稱良史焉既而桓溫見之怒謂盛子曰枋頭誠為
失利何至乃如尊君所說若此史遂行自是關君門戶
事其子遽拜謝因請刪改之時盛年老還家性方嚴有
軌憲雖子孫斑白而庭訓愈峻至此諸子乃共號泣稽
顙請為百口切計盛大怒諸子遂爾改之盛寫兩定本
寄於慕容雋太元中孝武帝博求異聞始於遼東得之
以相考校多有不同書遂兩存焉

干寶為著作郎始領國史累遷散騎常侍著晉紀自宣帝起至愍帝五十三年凡二十卷奏之其書簡畧直而能婉咸稱良史性好陰陽術數留思京房夏侯勝等寶父先有所寵侍婢母甚妬忌及父亡母乃生推婢於墓中寶兄弟年小不之審也後十餘年母喪開墓而婢伏棺如生載還經日乃蘇言其父常取飲食與之恩情如生在家中吉凶輒語之考校悉驗地中亦不覺為惡既而嫁之生子又寶兄嘗病氣絕積日不冷後遂寤云見天地間鬼神事

如夢覺不自知死寶以此遂撰集古今神祇靈異人物變化名為搜神記凡三十卷以示劉恢恢曰卿可謂鬼之董狐寶既博採異同遂混虛實因作序以陳其志曰雖考先志於載籍收遺逸於當時蓋非一耳一目之所親聞覩也亦安敢謂無失實者哉衛朔失國二傳互其所聞呂望事周子長存其兩說若此類往往有焉從此觀之聞見之難一絲來尚矣夫書赴告之定辭據國史之方策猶尚若茲况仰述千載之前記殊俗之表綴片言於

殘缺訪行事於故老將使事不二迹言無異塗然後為
信者固亦前史之所病然而國家不廢注記之官學士
不絕誦覽之業豈不以其所失者小所存者大乎今之
所集設有承於前載者則非余之罪也若使采訪近世
之事苟有虛錯願與先賢前儒分其譏謗及其著述亦
足以明神道之不誣也群言百家不可勝覽耳目所受
不可勝載今粗取足以演八畧之旨成其微說而已幸
將來好事之士錄其根體有以游心寓目而無尤焉

謝沉除尚書度支郎何充庾冰竝稱沉有史才選為著作郎撰晉書三十餘卷後漢書百卷及漢書外傳

習鑿齒為桓温荆州別駕出為滎陽太守是時温覬覦非望鑿齒在郡著漢晉春秋以裁正之始起漢光武終晉愍帝於三國之時蜀以宗室為正魏武雖受漢禪晉尚為篡逆至文帝平蜀乃為漢亡而晉始興焉引世祖諱炎興而為禪授明天心不可以勢力彊也凡五十四

卷

又撰襄陽耆舊傳五卷

韋謏集為石季龍太子太傅記世事數十萬言

袁宏為吏部郎遷東陽太守撰後漢紀三十卷及竹林名士傳三卷

薛榮為散騎常侍撰漢記六十五卷

張瑩為江州從事撰後漢南紀四十五卷

王沈為司空撰魏書四十八卷

環濟為太學博士撰吳紀九卷

張勃撰吳錄三卷

朱鳳為中書郎撰晉書十卷已元帝

庾銑撰東晉書七卷

嵇康為中散大夫撰高士傳三卷

陸機為平原內史撰晉紀四卷晉惠帝百官名三卷

樂資為著作郎撰春秋後傳三十卷山陽公載言十卷

荀綽為下邳太守撰晉後略記五卷

王羲之為右將軍會稽內史撰許先生傳一卷

王慶為北中郎將撰二石傳二卷二石偽治時事二卷

杜預為鎮南大將軍撰女記十卷

喻歸為侍御史撰西河記

記張執事

孔預為會稽內史撰晉咸和咸康故事四卷

一云名喻

盧緄為廷尉撰晉四王起事四卷八王故事十二卷

范瑗撰交州先賢傳三卷

潘岳為給事黃門郎撰關中記一卷

葛洪遜為散騎常侍領大著作固辭不就撰神仙傳十

卷西京雜記一卷

蕭廣濟為輔國將軍撰孝子傳五卷

戴祚為西戎太守撰甄異傳三卷西征記一卷

王愆期為散騎常侍撰救襄陽上都督府事一卷

孔衍為廣陵太守撰魏尚書八卷春秋時國語十卷春秋後國語十卷漢尚書十卷漢春秋十卷後漢尚書二卷後漢春秋九卷後魏尚書十四卷後魏春秋九卷國志歷五卷

賀循為太常撰會稽記一卷

鄧粲為荊州別駕以父騫有忠信言而世無知者乃著
晉元明紀十篇

顧夷撰吳郡記五卷

張氏撰晉書鴻烈六卷

左明楷為石勒記室與程機撰上黨國記

石泰為石勒參軍與石同石謙孔隆撰大單于志

和苞撰漢趙記十卷

田融撰趙石記二十卷

周融撰趙義一卷

一曰石集記
云石勒事

范亨撰燕書二十卷

張詮撰南燕錄五卷

記慕容
德事

游覽先生撰南燕書七卷

張詒撰涼記八卷

記張
執事

王景暉撰南燕錄六卷

蓋泓撰珠崖傳一卷

王子年撰拾遺錄二卷

隱士
無官

何仲燕撰秦書八卷

記符健等事

劉景撰燉煌實錄十卷涼書十卷

記張執事

段龜龍為著作郎撰西河記二卷涼記十卷

記名光事

宋徐廣為員外散騎常侍領著作尚書奏左史述言右官書事乘志顯於晉鄭春秋著乎魯史自聖代有造中興記者道風帝典煥乎史策而太和以降世歷三朝玄風聖迹儻為疇古臣等參詳宜勅著作郎徐廣撰成國史於是勅廣撰集焉累遷正員常侍大司農仍領著作

如故十二年勒成晉紀凡四十六卷表上之因乞解史

任不許

又撰孝子傳三卷

荀伯子少好學博覽經傳為員外散騎侍郎著作郎徐廣重其才學舉伯子及王韶之竝為佐郎助撰晉史乃著桓元等傳又撰薛常侍傳二卷

王儉為秘書丞元徽初儉表上所撰七志三十卷

王韶之好史籍博涉多聞父偉之少有志泰元隆安時事小大悉撰錄之韶之因此私撰晉安帝陽秋既成時

人謂宜居史職即除著作佐郎使續後事記義熙九年
善叙事辭論可觀為後代佳史又撰孝子傳十卷

續咸著遠遊志異物志皆十卷行於世

范曄左遷宣城太守不得志乃刪衆家後漢書為一家
之作曄所撰十志一皆託謝儼搜撰垂畢遇曄敗悉蠟
以覆車宋文帝令丹陽尹徐湛之就儼尋求已不復得
一代以為恨其志今闕

謝靈運為秘書監太祖以晉氏一代自始至終竟無一

家之史令靈運撰晉書粗立條流書竟不就

裴景仁為殿中員外將軍時沈曇慶為徐州刺史景仁助戍彭城本僨人多悉戎荒事曇慶使撰秦記十卷叙符氏僭偽本末其書傳於世

劉謙之好學撰晉紀二十卷

袁炳字叔明有文學為袁粲所知著晉書未成卒

何法盛為湘東太守初郝紹作晉中興書數以示法盛法盛有意圖之謂紹曰卿名位貴達不復俟此延譽我

寒士無聞於時如袁宏于寶之徒賴有著述流聲於後
宜以為惠紹不與至書成在齋內厨子法盛詣紹紹不
在直入竊書紹還失之無復兼本於是遂行何書

徐爰為中散大夫撰宋書六十五卷

臨川王義慶撰續漢書五十八卷宣驗記十三卷幽明
錄二十卷江右名士傳一卷

檀道鸞為永嘉太守撰續晉陽秋二十卷

郭季彥為新興太守撰續晉紀五卷

何承天為廷尉撰春秋前傳十卷春秋前雜傳九卷

段國為新亭侯撰吐谷渾記二卷

劉通會為北徐州主簿撰先朝故事二十卷

郭緣生為天門太守撰武昌先賢志二卷述征記二卷

鄭緝之為員外郎撰孝子傳五卷東陽記一卷

范晏撰陰德傳二卷

袁生壽撰古異傳三卷

劉敬叔為給事撰異苑十卷

陶潛為彭澤令撰搜神後記十卷

東陽無疑為散騎常侍為齊諧記七卷

劉損為太常卿撰京口記二卷

盛宏之為臨川王侍郎撰荊州記三卷

袁淑為太子左率撰真隱二卷

雷次宗以散騎侍郎徵詣宋邑撰豫章記一卷

南齊臧榮緒為徐州主簿純篤好學括東西晉為一書

記錄志傳一百一十卷又撰續洞記四卷

陸澄為光祿大夫給事中撰雜傳

檀超為司徒右長史建元二年初置史官以超與驃騎
記室江淹掌史職上表立條例開元紀號不取宋年封
爵各詳本傳無假年表立十志律歷禮樂天文五行郊
祀刑法藝文依班固朝會輿服依蔡邕馬彪州郡依徐
爰百官依范曄合州郡班固五星載天文日蝕載五行
改日蝕入天文志以建元為始帝女自皇宋立傳以備
甥舅之重又立處士列女傳詔內外詳議左僕射王儉

議金粟之重八政所先食貨通則國富民實宜加編錄以崇務本朝會志前史不書蔡邕稱先師胡廣說漢舊儀此乃伯喈一家之意曲碎小儀無煩錄宜立食貨省朝會洪範九疇一曰五行五行之本先乎水水之精是為月月五行之宗也今宜憲章前軌無所改革又立帝女傳亦非淺識所安若有高德異行自當載在列女若止於常美則仍舊不書詔曰月災隸天文餘如條議超史功未就卒官江淹撰成之猶不備也時豫章熊襄著

齊典上超十代其序云尚書堯典謂之虞書則附所述
故通為齊名為河洛金匱者

王智深遷太學博士豫章王大司馬叅軍兼記室世祖
勅智深撰宋紀召見芙蓉堂賜衣服給宅智深告貧於
豫章王王曰須卿書成當相訓以祿書成三十卷世祖
後召見智深於濬明殿令拜表奏上

劉涉撰齊紀十卷

孔稚珪為散騎常侍卒贈金紫光祿大夫撰陸先生傳

一卷

祖冲之為長水校尉撰述異記十卷

王巾撰法師傳十卷

梁沈約為尚書令以晉氏一代竟無全書年二十許便有撰述之意太始初征西將軍蔡興宗為啓明帝有勅賜許二十餘年所撰之書凡一百三十卷條流雖舉而採綴未周永明初遇亂失第五卷齊建元四年被勅撰國史永明二年又領著作撰次起居注五年春又被勅

撰宋書百卷齊紀高祖記十一卷

任昉為新安太守著雜傳二百四十七卷

江淹為金紫光祿大夫撰齊史十志行於世

李膺為益州從事著益州記三卷行於世

裴子野為鴻臚卿初曾祖松之宋元嘉中受詔續修何

承天宋史未及成而卒子野嘗欲繼成先業及齊永明

末沈約所撰宋書既行子野更刪撰為宋畧二十卷其

叙事評論多善約見而歎曰吾弗逮也蘭陵蕭琛北地

傅昭汝南周捨咸稱重之子野又撰衆僧傳二十卷

云一

撰名僧錄
二十卷

又欲撰齊梁春秋始草創未就而卒

顧協為荊州記室撰晉仙傳五篇瑣語十卷

陸昭學涉有思理歷中書侍郎尚書左丞撰晉書未就
又著陸史十五卷陸氏驪泉志一卷竝行於世

王僧孺為南康王諮議參軍撰東宮新記

蕭子顯為吳興太守好學屬文採衆家後漢考正同異
為一家之書又啓撰齊史書成表奏之詔付秘閣所著

後漢書一百卷齊書六十卷普通北伐記五卷貴儉傳
三卷

蕭子雲為侍中幼有文彩既長勤學以晉代竟無全書
弱冠使留心撰著至年二十六書成表奏之詔付秘閣
及為太子舍人撰東宮新記奏之勅賜束帛著晉書一
百一十卷東宮新記二十卷

吳均為奉朝請著齊春秋三十卷吳郡錢塘先賢傳五
卷續齊諧記一卷

鍾岢字長邱官至建康令著良史傳十卷

劉沓累官至尚書左丞自少至長多所著述撰高士傳
二卷東宮新舊記四十卷竝行於世

庾詵詔徵中書侍郎不起撰帝歷二十卷

邱仲孚為左丞撰皇典二十卷南宮故事百卷

江奮為光祿大夫好學尤悉朝儀故事撰江左遺典三
十卷未就卒

劉之遴為南郡太守撰神錄五卷

劉昭為中軍臨川王記室撰幼童傳十卷

臧儼為鎮南諮議撰棲鳳春秋五卷

陶弘景為諸王侍讀後辭祿自號華陽隱居撰帝代年
歷五卷周氏冥通記一卷草法師傳一卷

梁曷撰梁武帝大捨三卷

鄭忠撰晉書七卷

謝吳為中書郎撰梁書四十九卷梁皇帝錄五卷

王琰為吳令撰春秋二十卷冥祥記十卷

蕭韶為長沙王撰梁太清紀十卷

蕭世怡一云大園封樂浪王仕隋位內史侍郎撰淮海

亂離志四卷

叙梁末侯景之亂

謝綽為少府卿撰宋拾遺十卷

王逸撰齊典五卷

周興嗣為散騎員外侍郎給事中撰梁皇帝實錄三卷

并皇德紀

記武帝故事又云謝旻撰五卷

劉仲撰梁帝聖中興畧十卷

後梁安成王欣博學善屬文著梁史百卷遭亂失其本
陸雲公為黃門郎兼掌著作奏武帝勅撰嘉瑞記瓊述
其旨而續焉自永定訖于至德勒成一家之言

陳顧野王為光祿卿撰續洞冥記一卷國史傳三百卷
何之元為始興王叔陵諮議參軍及叔陵之誅元乃屏
絕人事銳精著述以為梁氏肇自武皇終於敬帝其興
亡之運盛衰之跡足以垂鑒戒定褒貶究其始終起齊
永元元年逮于王琳遇獲七十五年行事草創為三十

卷號曰梁典其序日記之與史其流不一編年之作無若春秋則魯史之書非帝皇之籍也三皇之簡為三墳五帝之策為五典此典義所繇生也至乃尚書述唐帝為堯典虞帝為舜典斯又經文明據是以典之為義久矣哉若夫馬史班漢述帝稱紀自茲厥後因相祖習及陳壽所撰名之曰志總其三國分路揚鑣唯何法盛晉書變帝紀為帝典既云師古在理為優故今之所作稱為梁典梁有天下自大同以前區寓寧晏太清已後寇

盜交侵首尾而言未為盡美故開此一書分為六意以高祖創基因乎齊末尋宗討本起自永元今以前若干卷為追述高祖生自布衣長於弊俗知風教之臧否識民黎之情偽爰逮君臨弘斯政術四紀之內寔云殷阜今以若干卷為太平世不常夷時無常治非自我後仍屬橫流今以若干卷為叙亂洎高祖晏駕之年太宗幽辱之歲謳歌獄訟唯向西陝而不向東都不庭之民流逸之士征伐禮樂歸世祖而不歸太宗撥亂反正厥庸

斯在治定功成其勳有屬今以若干卷為世祖至於四海困窮五德舛替則敬皇紹立仍以禪陳今以若干卷為敬帝驃騎王琳崇立後嗣雖不達天命是其忠節今以若干卷為後嗣主至在太宗雖加美謚而大寶之號世所不遵蓋以扼於賊景故也承聖紀歷自接太清神筆詔書非宜輒改詳之後論茲有理焉夫事有始終人有業行本末之間頗宜叙述案臧榮緒稱史無裁斷猶起居注繇此而言實資詳悉又編年而舉其歲次者蓋

取分明而易尋也若夫儉狃孔熾鯁我中原始自一君
終為二主事有相涉言成混漫今以未分之前為北魏
既分之後高氏所輔為東魏宇文所挾為西魏所以相
分別也重以蓋彰殊體繁省異文其關損益頗有凡例
許亨為衛尉卿撰齊書并志五十卷遇亂之後撰梁史
成者五十八卷

陸從典入隋為給事郎兼東宮學士又除著作佐郎右
僕射楊素奏從典續司馬遷史記迄于隋其書未就值


隋末喪亂

姚察入隋授秘書丞別勅成陳梁二代史所撰雖未畢
功文帝開皇之時遣中書舍人虞世基索本具進今在
內殿梁陳二史多是察之所撰其中序論及紀傳有所
闕者臨亡之時仍以體例誠幼子思廉博訪撰續思廉
流涕奏行思廉初補漢王府行參軍掌記室尋除河間
郡司法大業初中書侍郎虞世基奏思廉踵梁陳二代
史自是以來稍就補續

又撰傳國志十卷

許懋為著作郎著述行記四卷撰齊記二十卷

趙齊旦為中郎將撰陳王業歷一卷



冊府元龜卷五百五十五